

脉訣彙辨

自敘

趙郡李延是撰

余浪游者三十年託刀圭以餬口而無以辭負笈者顧其中胡能不自媿也所慨俗醫稱津筏者則先難經脉訣難經出自秦越人其純駁固未易論尤恠脉者所以定吉凶决死生至

淵微也苟阡陌之不存又何有於源  
委宋之高陽生一妄庸人假晉太醫  
令王叔和之名著成脉訣其鄙俚糺  
繆取資捧腹而陰操入室之戈於是  
先聖之旨一旦晦蝕世之哀然傳業  
承訛襲舛不復有所取裁譬渴者飲  
於濁涇之流呶呶而號於衆曰天下

之水味在是豈其然乎余不敏思有以極之乃彙古今之論脉者若干人參以家學片言隻字有當先聖而結妄庸之舌則拈之紙星霜十易積成徑寸門人輩請釐剔成編乃區爲十卷名曰脉訣彙辨命收之敝篋客曰固矣哉子也凡書之有作不歲諸名



山必傳之通邑大都將以救斯世詔  
來者君之所結集何難羽翼經傳而  
馳海內僅僅衣鉢於及門似乎靳於  
問世者何居余起而謝曰足下之沾  
沾於吾者不虞人之眊眊耶余嘗飯  
依古先生竊聞其教矣錯下一轉語  
墮野狐身五百世使余所綴集果醜

酬也往乞一玄晏而懸之國門誰曰  
不宜或猶未也淹博者笑其摭拾通  
達者笑其割裂抱匱守殘之徒更笑  
其迂而無當將見習高陽生之言者  
不必樹旗鼓而實偏處此卽以一丸  
泥自封余復奈之何哉雖然謹聞命  
矣姑付之剖劂氏以就正長者徐俟

大國之賦左提右挈廓清邪說願以  
是編爲前驅之笈



敘

天人之道一也天有五運六氣  
以成四時人之府俞經絡實因  
之聖人者人而天者也以天道  
治一身而性命各正以天道治  
天下而民物仁壽古之聖人不



爲君則爲相五帝三王風牧稷  
尙臯繇伊尹巫咸太公周召畢  
散之徒皆以治身者治世燮和  
陰陽祛除患害以還天地之雍  
熙故自古無不壽之聖人聖人  
而不爲君與相者自孔子始聖

人而不登上壽者亦自孔子始  
宓犧神農黃帝不欲其道僅傳  
于一時而發明之于靈素諸書  
以傳萬世孔子旣不得爲君且  
相焉以治一世又不忍若容成  
偃佺鼓聃莊列之徒僅以其道

私之于一身既悲閔憂勞轍環  
敝敝以傷其生而勤勤焉刪述  
筆削詩書以傳萬世不徒欲壽  
萬世之人之身而欲救萬世之  
人之心使不徒生而虛死則醫  
藥之道直視爲小數周公列之



庶官之末孔子孟亦等之巫匠之  
流聖人不貴也非聖人之不貴  
亦謂所欲有甚于生所惡有甚  
于死則治心又急于治身也世  
雖不古而生民之道不可絕于  
是和扁之徒發明黃帝之旨俾



無絕于世而長沙河間東垣丹  
溪四氏得引申觸類而長之著  
書立言以傳述來茲天下謂之  
四聖四氏者不居聖人之名而  
能心聖人之心以救民物者也  
先賢謂不爲良相則爲良醫四

氏之徒勞于撰述而不已者以  
爲湯液劑鍛之功在一時不若  
筆之于書爲功萬世之大也近  
世言軒岐之言者徧海內能盡  
其道者曠世而少一遇也雲間  
李念莪先生固近代之和扁也

期叔李子瓌才偉器思有所爲  
以立效于時旣不得志益研窮  
其家學精妙入神出而應物往  
徃竒效沉痼之疾諸家罔措期  
叔按指望色而知之忽焉起死  
人而肉白骨名滿南北而期叔



歆然不自足也研幾極深撰次  
成書曰脉訣彙辨益暢念我未  
盡之旨凡二十餘年七易藁而  
始定補前聖之未備正徃賢之  
或差凡叔和伯仁諸家之微乖  
偶類無不刊而正之條分縷晰



以明僞訣之誤以歸靈素之正  
譬之于書四氏則孔子之述六  
經也期叔則孟子之闢邪說也  
古人謂孟子之功不在禹下吾  
于期叔亦云山海可童可泐此  
書必不可廢海內宗工故能辨